

五礼通考

第五
函十一册

五禮通考卷第一百

內廷供奉禮部右侍郎金匱秦蕙田編輯

兩淮都轉鹽運使德水盧見曾

參校

李葆懌纂輯都御史桐城方觀承同訂

直隸按察司副使元和宋崑完

吉禮一百

禘祫

金史禮志汴京之廟在宮南馳道之東殿規一屋四閒限其北爲神室其前爲通廊東西二十六楹爲間二十有五每間爲一室廟端各虛一閒爲夾室中二十三閒爲十一室從西三閒爲一室爲始祖廟祔德帝安帝獻祖昭祖景祖祧主五餘皆兩閒爲一室世祖室祔肅宗穆宗室祔康宗餘皆無祔每室門一牖一門在左牖在右皆南向石室之龕於各室之西壁東向其世祖之龕六南向者五東向者一其二其三俱二龕餘皆一室一

龕總十八龕祭日出主於北牖下南向禘祫則竝出主
始祖東向羣主依昭穆南北相向東西序列

世宗大定三年八月有司議祫享犧牲品物案唐開元
禮宋開寶禮每室犢一羊一猪一五禮新儀每室復加
魚十有五尾天德貞元例與唐宋同有司行事則不用
太牢七祀功臣羊各二酒共二百一十瓶正隆減定通
用犢一兩室共用羊一豕一酒百瓶此於禮有缺今七
祀功臣牲酒請依天德制宗廟每室則用宋制加魚然
每室一犢後恐太豐世宗乃命每祭共用一犢羊豕如
舊又以九月五日祫享當用鹿肉五十斤獐肉三十五
斤兔十四頭爲醯醢以貞元正隆時方禁獵皆以羊代
此禮殊爲未備詔從古制

十年正月詔宰臣曰古禮殺牛以祭後世有更者否其

檢討典故以聞有司謂自周以來下逮唐宋祫享無不用牛者唐開元禮時享每室各用太牢一至天寶六年始減牛數太廟每享用一犢宋政和五禮新儀時享太廟親祀用牛有司行事則不用宋開寶二年詔昊天上帝皇地祇用犢餘大祀皆以羊豕代之合二羊五豕足代一犢今三年一祫乃爲親祀其禮至重每室一犢恐難省減遂命時享與祭社稷如舊若親祀宗廟則共用一犢有司行事則不用

十一年尚書省奏禘祫之儀曰禮緯三年一祫五年一禘唐開元中太常議禘祫之禮皆爲殷祭祫爲合食祖廟禘爲禘序尊卑申先君逮下之慈成羣嗣奉親之孝自異常享有時行之祭不欲數數則黷不欲疏疏則怠是以王者法諸天道以制祀典烝嘗象時禘祫象閏五

歲再閏天道大成宗廟法之再爲殷祭自周以後竝用此禮自大定九年已行祫禮若議禘祭當於祫後十八月孟夏行禮詔以三年冬祫五年夏禘爲常禮享日竝出神主前廊序列昭穆應圖功臣配享廟庭各配所事之廟以位次爲序以太子爲亞獻親王爲終獻或竝用親王或以太尉爲亞獻光祿卿爲終獻其月則停時享十二年十月祫享以攝官行事詔共用三犢

十七年十月祫享太廟檢討唐禮孝敬皇帝廟時享用廟舞宮縣登歌讓皇帝廟至禘祫月一祭止用登歌其禮制損益不同今武靈皇帝廟庭與太廟地步不同難以容設宮縣樂舞并樂器亦是闕少看詳恐合依唐讓皇帝祫享典故樂用登歌所有牲牢尊俎同太廟一室行禮及契勘得自來祫享遇親祠每室一犢攝官行禮

共用三犢今添武靈皇帝別廟行禮合無依已奏定其用三犢或增添牛數奏奉敕旨太廟別廟共用三犢武靈皇帝廟樂用登歌差官奏告竝準奏

十九年禘祭昭德皇后廟不用犢

世宗本紀大定二十二年十月庚戌祫享於太廟

禮志詔祫禘共用三犢有司行事則以鹿代

世宗本紀二十七年十月祫享於太廟

禮志大定二十九年章宗卽位禮官言自大定二十七年十月祫享至今年正月世宗升遐故四月不行禘禮案公羊傳閔公二年吉禘於莊公言吉者未可以吉謂未三年也注謂祫禘從先君數朝聘從今君數三年喪畢遇禘則禘遇祫則祫故事宜於辛亥歲爲大祥三月禘祭踰月則吉則四月一日爲初吉適當孟夏禘祭之

時可爲親祠詔從之及期以孝懿皇后崩而止五月禮
官言世宗陞祔已三年尙未合食於祖宗若來冬遂行
祫禮伏爲皇帝見居心喪喪中之吉春秋議其速恐冬
祫未可行然周禮王有哀慘則春官攝事竊以世宗及
孝懿皇后陞祔以來未曾躬謁豈可令有司先攝事哉
況前代令攝事者止施於常祀今乞依故事三年喪畢
祫則祫禘則禘於明昌四年四月一日釋心喪行禘禮
上從之

章宗本紀明昌四年四月戊申親禘於太廟

禮志明昌三年十二月尙書省奏明年親禘室當用犢
一欽懷皇后祔於明德之廟案大定三年祫享明德皇
后室未嘗用犢敕欽懷皇后亦用之上因問拜數右丞
瑋具對上曰世宗聖壽高故殺其數亦不立於位今當

從禮而已大定六年定晨裸行禮自大次至版位先見神之禮兩拜再至版位又兩拜裸鬯畢還版位再兩拜還小次酌獻時疊洗位盥訖至版位先兩拜酌獻畢還版位再兩拜止將始祖祝冊於版位西南安置讀冊訖又兩拜還小次又至飲福位先兩拜飲畢兩拜凡十六拜

章宗本紀承安元年十月丙辰祫享於太廟

泰和元年冬十月乙酉祫享於太廟

三年四月乙巳禘於太廟

八年四月戊申禘於太廟

宣宗本紀貞祐二年正月癸未有司奏請權止今年禘

享從之

禮志貞祐四年

原本二年誤

命參知政事李革爲修太廟使七

月吉日親行耐享有司以故事用皇帝時享儀初至版位兩拜晨裸及酌獻則每位三拜飲福五拜總七十九拜今升耐則徧及祧廟五室則爲一百九拜也明昌閒常減每位酌獻奠爵後一拜則爲九十二拜而已然大定六年世宗嘗令禮官通減爲十六拜又皇帝當散齋四日於別殿致齋三日於大慶殿今國事方殷宜權散齋二日致齋一日上曰拜數從大定例餘準奏禮部尙書張行簡言近奉詔從世宗十六拜之禮臣與太常參定儀注竊有疑焉謹案唐宋親祠典禮皆有通拜及隨位拜禮世宗大定二年親行奉安之禮亦通七拜每室各五拜合七十二拜逮六年禘始敕有司減爲十六拜仍存七十二拜之儀其意亦可見矣蓋初年享禮以備故後從權更定通拜今陛下初廟見奉安而遽從此制

是於隨室神位竝無拜禮此臣之所疑一也大定閒十
有二室姑從十六拜猶可今十有七室而拜數反不及
之此臣之所疑二也況六年所定儀注惟於皇帝版位
前讀始祖一室祝冊夫祭有祝辭本告神明今諸祝冊
各書帝后尊諡及高曾祖考世次不一皇帝所自稱亦
自不同而乃止讀一冊餘皆虛設恐於禮未安此臣之
所疑三也先王之禮順時施宜不可多寡惟稱而已今
近年禮官酌古今別定四十四拜之禮初見神二拜晨
裸通四拜隨室酌獻讀祝畢兩拜飲福四拜似爲得中
上從之乃定祔享如時享十二室之儀又以祧廟五主
始祖室不能容止於室戶外東西一列以西爲上神主
闕者以升祔前三日廟內敬造以享日丑前題寫畢以
次奉陞十月己未親王百官自明俊殿奉迎祖宗神主

於太廟幄次辛酉行禮用四十四拜之儀無宮縣樂犧
牲從儉十七室用犢三羊豕九而已以皇太子爲亞獻
濮王守純爲終獻皇帝權服靴袍行禮日服袞冕皇太
子以下公服無鹵簿儀仗禮畢乘馬還宮

宣宗本紀興定四年四月禘於太廟

元光二年十月己卯祫於太廟

續文獻通考哀宗釋服將禘享太廟有司奏冕服成上
請仁聖慈聖兩宮太后御內殿因試衣之以見兩宮大
悅上更便服奉觴爲兩宮壽仁聖太后諭上曰祖宗初
取天下甚不易何時使四方承平百姓安樂天子服此
法服於中都祖廟行禘享乎上曰阿婆有此意臣何嘗
忘慈聖太后亦曰恆有此心則見此當有期矣

金史樂志

禘祫親饗皇帝入門宮縣無射宮昌甯之曲

出入步武同

惟時升平禮儀肇興鳴鑾至止穆穆造庭百辟卿士恪謹迎承恭隸祖考神宇攸甯

皇帝升殿登歌夾鐘宮昌甯之曲

升階及將還板位皆同登歌

笙鏞

既陳曩尊在戶升降有容惟規惟矩恭敬明神上儀交舉永言保之承天之祐

皇帝盥洗宮縣無射宮昌甯之曲

惟水之功潔淨

精微洗爵奠斝于德有輝皇皇穆穆宗廟之威宜其感格福祉交歸

皇帝降階宮縣無射宮昌甯之曲

於皇神宮象天

清明有來肅肅相維公卿禮儀卒度君子攸甯孔時孔惠綏我思成

迎神宮縣來甯之曲黃鍾宮三奏大呂角二奏太簇

徵二奏應鍾羽二奏詞同 八音克諧百禮具舉明
德維清至誠永慕神之格思雲駢風馭來止來臨千
祀燕處

蕙田案此迎神九奏極得周禮九變之意

司徒引俎宮縣無射宮豐甯之曲 維牲維犧齊明
致祠我將我享吉蠲奉之博碩肥腍神嗜爲宜千秋
歆此永綏黔黎

始祖酌獻宮縣無射宮大元之曲 惟酒旣清惟穀
旣馨苾芬孝祀在廟之庭羞于皇祖來燕來甯象功
昭德先祖是聽

德皇帝大熙之曲 萬方欣戴鴻業創基瑤源垂裕
縣飭重熙式崇恭祀爰考成規籩豆有楚益臻皇儀
安皇帝大安之曲 爰圖造邦載德其昌皇儀允穆

誕集嘉祥明誠昭格積厚流光祇嚴清廟鐘石琅琅
獻祖大昭之曲惟聖興邦經始之初鳩民化俗還
定攸居迪德純儉志規遠圖時哉顯祀精誠有孚
昭祖大成之曲天啟璇源貽慶定基率義爲勇施
德爲威耀武拓境功烈巍巍永昌皇祚均福黔黎
景祖大昌之曲丕顯鴻烈基緒隆昌聖期誕集邦
宇斯張尊嚴廟祐昭格休祥煌煌緝典億載彌光
世祖大武之曲桓桓代功天鑒其明惟威震疊惟
德綏甯神策無遺鴻圖以興曾孫孝祀邁昭厥成
肅宗大明之曲於皇神人武烈文謨左右世祖懷
柔埽除威振遐邇化漸蟲魚垂光縣永成帝之孚
穆宗大章之曲烝哉文祖欽聖宏淵慈愛忠信典
策昭然歆此明祀繁祉縣縣時純熙矣流慶萬年

康宗大康之曲

惟明惟聽煜煜神功儀刑世業昭

格上穹持盈孝孫薦芳斯豐錫我社福皇化益隆

太祖大定之曲

功超殷周德配唐虞天神協應平

統寰區開祥垂裕肇基永圖明明天子敬陳典謨

太宗大惠之曲

巍巍德鴻無爲端屨祚承神功究

馴俗嫩清宮緝熙孝悌時祀欽奠著誠犧尊嘉旨

熙宗大同之曲

昭顯令德神基丕承對越在天享

用躋升於穆清廟來燕來甯神其醉止惟欽克誠

睿宗大和之曲

皇祖開基周武殷湯猗歟聖考嗣

德彌光啟祐洪緒長發其祥嚴恭廟享萬世烝嘗

世宗大鈞之曲

神之來思甫登于堂裸圭有瓚秬

鬯芬芳巍巍先功啟祐無疆萬年肆祀孝心不怠

顯宗大甯之曲

於皇神宮有嚴惟清吉蠲孝祀惟

神之甯對越在天綏我思成敷佑億年邦家之慶
章宗大隆之曲 兩紀踐祚萬方甯康文經天地武
服遐荒禮備制定德隆業昌居歆典祀億載無疆
宣宗大慶之曲 猗歟聖皇三代之英功光先后德
被羣生牲粢惟馨鼓鐘其鏗神兮來思歆于克誠
文舞退武舞進宮縣無射宮肅甯之曲 明明先聖
神武維揚開基垂統萬世無疆干戚象功威儀有光
神保是饗昭哉降康

亞終獻無射宮肅甯之曲 涓辰之休昭祀惟恭威
儀陟降惟禮是從遵豆靜嘉於論鼓鍾惟皇受祉監
斯德容

皇帝飲福登歌夾鐘宮福甯之曲 犧牲充潔粢盛
馨香來格來享精神用彰飲此純禧簡簡穰穰文明

天子萬壽無疆

徹豆登歌夾鐘宮豐甯之曲

孝祀肅睦明德以薦

樂奏九成禮終三獻百辟卿士進徹以時小大稽首

神保聿歸

送神宮縣黃鐘宮來甯之曲

潔茲牛羊清茲酒醴

三獻攸終神既燕喜神之去兮載錫繁祉萬壽無疆

永保禋祀

祫禘有司攝事

初獻盥洗宮縣無射宮肅甯之曲

祀事之大齋栗

爲先潔精以獻沃盥于前既灌以升乃薦豆籩神其

感格歆于吉蠲

升自西階登歌奏夾鐘宮嘉甯之曲

餘茲同親祀

國有太

宮合食以禮躋階肅肅降陞濟濟鏘然純音節乃容